ment vne histoire, & se concilier l'attention de celles qui les écoutent.

Si les actions exterieures font des indices des mouuemens & des affections du cœur, ces enfans croiffent tous les iours en la deuotion & en la vertu, elles font tous les foirs l'examen de leur confcience, & s'entr'aduertiffent auec paix de leurs petits defauts; elles ont vn tres-grand foin de rechercher leurs offenses quand il fe faut confesser; il y en a vne qui n'a pas plus de huict ans, qui parle aux plus petites, les aide à s'examiner, & leur recommande fur tout de ne cacher aucun peché. Ie puis rendre bon témoignage de leur conscience; mais ie puis affurer auec sincerité, que ie n'ay entendu aucun enfant François de leur âge, ny deça ny dela l'Ocean, qui ouurit fon cœur plus nettement, & qui en reconnût mieux les petits plis & replis; en vn mot, les Sauuages fe confessent parfaitement bien; c'est chose admirable [12] comme ils conçoiuent l'importance de ce Sacrement, cela m'a par fois donné de l'étonnement, de voir que les barbares connoiffent ce que les heretiques ignorent, ou veulent ignorer.

La veille de l'Affomption de la faincte Vierge, vn Pere ayant ouy en confession la petite Anne Marie Negabamat, cette enfant luy dit apres l'absolution, N8sai eapitch ni-8ich tissara8i; Mon pere, ie veux toussiours estre vierge, ne me faites point sortir de cette Maison, ie desire d'y demeurer toute ma vie; ses paroles toucherent le Pere, se ressourenant des resistances qu'elle luy auoit faites, iusques là qu'il la prit vne fois, & sit semblant de la jetter dans la riuiere, voyant qu'elle ne vouloit pas obeïr à ses parens, qui luy commandoient de demeurer auec ces bonnes Filles.